

Inatsisartut suleriaasiat § 32 naapertorlugu Inatsisit atortinneqarnerannut ataatsimiititaliami ilaasortat matumuuna aalajangiiffigisassatut siunnersuut saqqummiuppaat:

Inatsisartut Ombudsmandiata 2008-imut ukiumoortumik nalunaarutaata Inatsisartunit tusaatissatut tiguneqarnissaanik Inatsisartut aalajangiiffigisassaattut siunnersut.

(Inatsisit atortinneqarnerannut ataatsimiititaliap siulittaasua Harald Bianco, Inuit Ataqatigiit, Inatsisit atortinneqarnerannut ataatsimiititaliami ilaasortaq Isak Hammond, Inuit Ataqatigiit, Inatsisit atortinneqarnerannut ataatsimiititaliami ilaasortaq Aleqa Hammond, Siumut, Inatsisit atortinneqarnerannut ataatsimiititaliami ilaasortaq Justus Hansen, Demokraatit, Inatsisit atortinneqarnerannut ataatsimiititaliami ilaasortaq Akitsinnguaq Olsen, Siumut)

Tungavilersuut:

Allaffissornikkut aqutsinerup inatsisini sinaakkusiussat iluanni kiisalu ingerlatsivinni inatsisitigut malitarisassat iluini ingerlanneqarnissaa pillugu Inatsisartut inatsisiliortutut Ombudsmandi nakkutilliisussatut suliaqarnissaanik pisussaaffilersippaa. Taamaalilluni Ombudsmandi Inatsisartut Naalakkersuisunik nakkutilliinerannut sakkuuvoq, kisiannili aamma nunap inuttaasa eqqartuussiveqarnikkut illersugaanissaannut qulakkeerinnittuulluni. Ombudsmandi taamaalilluni tassaavoq *Inatsisartut innuttaasullu* ataatsimut Ombudsmandiat.

Inatsisartut Ombudsmandiat ukiut tamaasa Inatsisartunut nalunaarusiortarpoq, tassa ukiumi qaangiuttumi Ombudsmandip suliarisarsimasani nalunaarusiaralugit.

Ukiumoortumik nalunaarusiat aammattaq tamanit takuneqarsinnaapput Ombudsmandip nittartagaani www.ombudsmand.gl. Taamatuttaaq Ombudsmandip aalajangiuppaa, ukioq nalunaarusiorfik 2009 aallarnerfigalugu Ombudsmandip suliat ilanngukkusussinnaasani ukiumoortumik nalunaarusiornerminut atatillugu nittartakkamut ingerlaavartumik ivertittalerniarlugit. Tamanna Inatsisit atortinneqarnerannut ataatsimiititaliamik isumaqateqareerluni pivoq, neriuutigineqarporlu suliniummi tassani Ombudsmandip suliarisartagai pillugit inuttaasut ilisimasaqarnerulernissaat, kiisalu matumani innuutaasoq isumaqaruni eqqunngitsumik sullinneqarsimalluni ingerlatsivinni oqartussaasunut Ombudsmandimut maalaarnissamut periarfissat ilanngullugit.

Ataatsimiinnermi tassani Inatsisartut Ombudsmandiata ukiumoortumik nalunaarusiami imarisaata ilaanik ataatsimiititaliamut immikkut soqutiginaatillit ataatsimiititaliamut paasissutissiissutigineqarput.

Taamatut oqaaseqarluni Inatsisartut Ombudsmandiata 2008-imut nalunaarutaa pillugu siunnersuut Inatsisartunit tusaatissatut tiguneqartussanngorlugu Inatsisit Atortinneqarnerannut Ataatsimiititaliap isumaqatigiittup saqqummiuppa.

Ilanngulluguttaaq Inatsisartut Ombudsmandiat 2008-imi suliaanut annertuunut Inatsisit Atortinneqarnerannut Ataatsimiititaliap qujassuteqassaaq.